

平定粵寇紀略

一
函
十
三
冊
函

平定粵寇紀畧卷十三

同治元年壬戌正月江北軍克復江浦浦口

李提督世忠攻克天六乘勢進圖江浦浦口約守
壘之賊劉元成單玉功等爲內應正月初四日揮
隊直前賊眾驚潰元成等率眾倒戈殺斃僞報王
秦姓僞王宗操天福等七十餘名餘賊搜殺殆盡
立復江浦縣城次日至浦口城下九洑洲援賊大
至世忠激勵將弁痛殲之復得其城賊竄江邊追
殺落水者極眾

左軍由徽入浙三獲大捷衢屬開化肅清

賊首僞輔王楊輔清率大股由嚴州之遂安縣踰
嶺以窺徽州府又合賊目鍾明佳等蔓延衢州府
屬開化縣之張邨中邨等處兩股合計十萬人其
奸謀在深入江皖腹地阻援浙之師以合圍衢郡
左巡撫於上臘派候選直隸州劉典率各營從江
西之廣信間道馳赴婺源卽由此入浙自率親兵
赴婺督勦三戰三捷開化縣境一律肅清飭令老
湘營進駐開化自駐馬金街相機再進前此閩浙

軍務凡得一城往往復失更有以他竄爲攻克者
自左巡撫督辦後從皖南轉戰而前如櫛亂髮逐
節清疏所克各城無復失之患

賊眾窺伺上海英法各外國助剿

賊眾退後復撲吳淞口進擾上海縣之東西擺渡

適會防局定法國輪船在渡頭開礮相助斃賊無

算退踞天馬山陳坊橋參將李恒嵩破其壘敗賊

退入青浦城另股由浦東進踞高橋欲斷我要隘

美國人華爾約同英國水師提督何伯法國水師

提督卜羅德各帶中外槍礮隊伍礮船排列海濱
華爾率副領隊美國人白齊文撲進賊巢立將賊
壘掃蕩各外國自立會防局矢願同仇極得協助
之力華爾白齊文感慕華風願更服色爲中國臣
民薛巡撫以聞得

旨嘉獎竝賞給四品頂戴花翎以示鼓勵薛巡撫卽飭
於松江教兵勇習洋槍協同勦賊稱洋槍隊爲常
勝軍

二月浙軍攻克遂安縣回援衢州

左巡撫於開化肅清後聞金華龍游之賊紛紛上
竄距衢州府及江山縣二城各止數十里遂由馬
金街拔營親往援勦行抵常山縣境接探報賊首
李侍賢喉令壽昌蘭溪之賊糾約踞遂安賊目賴
連繡犯開化馬金街以衢州有總兵李定泰一軍
江山常山有署布政使李元度一軍各八千餘人
足以自守遂折回遂安力攻縣城二月初九日克
之斃賊以萬計生擒僞符天侯羅音等賊目數十
名卽取道常山進援衢郡

上海軍勦除蕭塘賊壘

官軍埽蕩高橋各賊壘直擣蕭塘二月初一日華爾與副領隊白齊文率常勝軍猛撲各受重傷仍不少卻破壘五座官軍亦分路兜勦擒斬極多
楚軍進勦安徽廬州府毀賊壘卡

副都統多隆阿率楚軍由舒城進攻廬郡漸次逼城賊乘我築壘未完突出六七千人分股來撲我以馬隊包抄斃賊五六百名二月初一日總兵雷正綰率隊渡河焚其礮船及買賣街初二四等日

復飭雷正綰與記名總兵石清吉等攻破賊卡四處木城四道西門得勝門賊壘四座連日斃賊三千餘名

安徽潁州解圍

賊由河南糾合捻匪圍攻潁州挖重濠密排鹿角以困之布政使賈臻力保危城百計堵禦正月賊用地雷轟闕東北關營牆率眾上撲游擊范文英李安邦裹創力堵適起狂風煙燄回撲賊陣我軍得將闕口堵合時勝大臣由太和縣督兵馳援

二月初三日砍砦衝入賊壘斃賊千餘賈臻在城
巡瞭見勝軍得手亦整隊出城夾擊破北面賊巢
賊遂東竄我軍乘勢埽蕩蹋毀東西南三面賊壘
三十七座城圍立解

皖軍克復店埠要隘

店埠在廬州東北三十里爲定遠赴廬要隘前和
提督福巡撫攻勦時屯重兵於此後爲賊踞築石
城極堅皖軍亟攻之賊首僞英王陳玉成由廬城
添派賊首卜姓協守總兵張得勝乘夜直抵石城

一擁而入立將小賊砍倒賊眾驚潰追三十餘里
遂克店埠

三月福建延邵遺缺道李鴻章統領淮湘軍東下
先是曾大臣議以布政使曾國荃由陸路先攻和

巢含各州縣李鴻章統領諸軍乘勢衝城而過趨
鎮江會同馮提督子材軍以圖進取適上海賊氛
日逼勢濱於危署布政使吳煦籌借饟銀二十餘
萬兩作雇備輪船川資仍遣錢鼎銘厲學潮赴安
慶迎師時國荃全軍已次第前進鴻章前隊亦將

拔營鼎銘等夜叩曾大臣營力陳上海危急及可
進兵狀籌議終夜許之遂改令鴻章率程學啟等
淮軍十一營湘軍一營於三月初七日乘輪船東
下初十日抵上海駐營城南淮揚鎮黃翼升統領
水軍衝越金陵赴滬會師

揚州軍勦退渡江賊

賊由金陵下擾糾合蘇州之眾計十餘萬人渡江
撲揚州都將軍興阿知賊眾且銳嚴約各營勿輕
出戰俟賊近登壁擊之傷賊甚多退而赴鄉掠食

三月十三日我軍至徐家集等處誘令出卡殺斃
四百餘名十六日賊由法海寺起至虹橋七里甸
等處排列長陣都將軍督隊出擊直趨虹橋翼長
徐州鎮總兵詹啟綸副將左起龍由三汊河率隊
抄擊各斃賊四五百名十七日賊選洋槍隊衝至
西門外列於河西此隊爲張提督王良舊部在蘇
州從賊者極壯健跳浪廣西平樂協副將刁經明
等覓水往攻賊以大隊壓下我軍驟退儘先都司
廖長明率驍騎勇五百人奮勇衝遏十餘回合始

漸退各軍轉戈再戰大敗之追殺十餘里乃歸後
數日復派隊分路攻擊賊退往儀徵

皖軍奪取駐馬邨要隘

金陵分賊渡江爲李提督世忠擊走竄踞安徽和
州之駐馬邨依險築壘以通由南竄北之路李提
督飭總兵王茂元等自林浦等處分道進攻衝爲
兩截賊棄壘狂奔我兵沿江趕殺全毀賊壘立將

駐馬邨奪回

曾營鮑軍克復青陽縣

曾大臣派浙江提督鮑超於上年十二月進攻青陽疊破援賊本年二月十五日鮑提督飭副將劉順隆先平西北門山觜賊壘濬治長濠四面圍合城賊勢蹙潛糾浙江死黨三萬餘眾進撲銅陵冀分我軍之勢以解青陽之圍三月初六日鮑提督由青陽分軍親率赴援初七日遇賊於橫塘飭三路進攻又令左右抄擊賊恃眾悍迎拒兩時副將王衍慶等大呼陷陣副將顏紹棠等潛取小徑繞襲賊後知府伍華瀚等分領馬步四出盪決將橫

塘等處百餘卡二十六壘盡數剷除先是僞奉王
古隆賢偵知鮑提督分兵而北陰統涇太悍賊在
青陽南門外豬婆店增築九壘將欲阻我旋師以
通賊之糧道適鮑提督已振旅而還遂於十五日
督飭將士拔開鹿角躍過濠溝不逾時而九壘悉
毀自是軍心愈壯賊膽愈寒鮑提督知青陽利在
速攻乃於十六日秣馬蓐食銜枚疾進諸將弁裹
創血戰志在必得劉順隆等攀堞先登眾軍乘之
登時將縣城克復

曾營水陸各軍擊敗竄賊舊縣荻港等處肅清

蕪湖賊首偽堵王黃文金等糾黨二萬突入荻港
三月初四日復分股竄陷繁昌之舊縣勢將下犯
三山峽初五日水師營官今江南提督李朝斌等
在營房觜擊賊獲勝遂率所部駛至舊縣會合營
官萬化林等登陸排礮環轟賊負創潰走不敢踞
卡專事野掠潛約荻港一股勾結繁昌蕪湖魯港
之賊別圖窺竄時同知曾貞幹陸師進駐三山峽
距舊縣三十里密諭各營堅壁以待十三十四等

日賊果分道來犯貞幹率各營及螃蟹磯水師循江岸而進一敗賊於洋夾河再敗賊於三華山賊始悉眾遠遁荻港等處一律肅清

河南南陽府戒嚴

楚軍攻安徽廬州甚急僞英王陳玉成密令僞扶王陳德才率黨三萬餘人句合捻匪孫光危陳大禧兩股約二萬餘人由河陽唐縣直逼南陽府城以圖分我兵力河南鄭巡撫元善駐師許州派兵勇馳援湖北官大臣等亦派總兵何紹彩領新訓